

Veće sankcije za krivična djela počinjena iz mržnje

PRIJEDLOZI PRED MINISTROM JOZIĆEM

Koalicija za borbu protiv govora mržnje i zločina iz mržnje jučer je održala pres-konferenciju ispred zgrade federalnog Ministarstva pravde, na kojoj je prezentovala rad na suzbijanju i regulaciji krivičnih djela počinjenih iz mržnje u FBiH. Članice Koalicije uputit će ministru Mati Joziću zahtjev za sastanak, na kojem bi predstavile prijedlog amandmana za regulisanje ovih krivičnih djela, te razgovarale o potrebi što skorijih izmjena i dopuna Krivičnog zakona FBiH.

Neprihvatljiv govor

Izmjene i dopune KZFBiH kojima bi se adekvatno regulisala i sankcionisala krivična djela počinjena iz mržnje čekaju od 2010. godine. U 2013. i 2014. ove izmjene razmatrane su u Parlamentu FBiH, te su usvojene na Predstavničkom domu. Dom naroda PFBiH u 2013. nije ih usvojio, a

2014. nije sazvana sjednica na kojoj bi se o njima odlučivalo. Nužno je ponovo inicirati izmjene i dopune KZFBiH kako bi i FBiH regulisala krivična djela počinjena iz mržnje, što je već 2010. učinjeno u Brčko distriktu i RS-u. Direktorica Asocijacije za demokratske inicijative Snježana Ivandić-Ninković pojasnila je da je zločin iz mržnje specifično krivično djelo motivirano predrasudama, da je usko povezano s govorom mržnje, kao i da je, nažalost, mali broj sankcioniranih slučajeva u toj oblasti.

- Od 2011. godine povećalo se prisustvo ovakvih krivičnih djela. Dio političkih stranaka tokom predizborne kampanje koristio je neprihvatljiv govor. Na primjeru povratnika vidjet ćete kako to pitanje nikako nije regulirano. Svako može uzviknuti bilo šta i može uništiti vašu imovinu, a počinitelj neće biti adekvatno kaž-



Vasić: Zagovaramo generalnu odredbu

njen, jer nema dobre zakonske odredbe. Žrtve su najčešće povratnici, ali i Romi, odnosno manjinske grupe ljudi koje nisu sposobne da se same zaštite, kao i oni slabijeg imovinskog stanja, rekla nam je Ivandić-Ninković.

Vladana Vasić, koordinator za programe Sarajevskog otvorenog centra, objasnila je da inicijativom ka resornom ministarstvu žele inicirati promjene KZFBiH u smislu regulisanja zločina iz mržnje.

Kazna odmah

- Zagovaramo generalnu odredbu kojom će se definisa-



Ivandić-Ninković: Malo je sankcija izrečeno

ti da su sva krivična djela zločini iz mržnje ako su motivisani predrasudom i da se za određena djela jačeg intenziteta automatski upiše kazna ako su počinjena iz mržnje, istakla je Vasić.

Koaliciju čine Asocijacija za demokratske inicijative, Centar za mlade KVART, Civil Rights Defenders, CURE, Mediacentar Sarajevo, Fondacija Istina, pravda, pomirenje, Inicijativa mladih za ljudska prava BiH, Otaharin, Omladinska novinska asocijacija u BiH, Sarajevski otvoreni centar, Udruženje BH novinari i Vijeće za štampu BiH.

A. BUSULADŽIĆ